

Nunalerinermut, imminut pilersornermut, inuussutissanut, nutaaliornermullu aamma imminut akilersinnaanermut allaaveqartumik ilinniartimmik pilersitsisoqarnissaa siunertaralugu INUILI suleqatigalugu Naalakkersuisut peqquneqarnissaannik Inatsisartut aalajangiiffigisassaattut siunnersuut. Pilersitsinissap killiffia kingusinnerpaamik UPA2026-imi saqqummiunneqassaaq.
(Inatsisartunut ilaasortaq Mariane Paviassen Jensen, Inuit Ataqatigiit)

Akissuteqaat

(Ilinniartitaanermut, Kultureqarnermut, Timersornermut Ilageeqarnermullu Naalakkersuisoq)

Siullermeerneqarnera

Siunnersuummut Inatsisartunut ilasortaq, Marianne Paviassen Jensen, Inuit Ataqatigiit Naalakkersuisut sinnerlugit qutsavigaara.

Nunalerinermut, imminut pilersornermut, inuussutissalerinermut, nutaaliornermut aamma piujuartitsinermut aallaaveqartunut ilinniakkat nukittorsarneqarnissaat kissaatigineqartoq Naalakkersuisut taperserpaat.

Naalakkersuisut suleqatigiissitamik pilersitsinissaq kissaatigaat, taassumalu INUILI-mi ilinniakkat misissorneqarnissaat nutarsarneqarnissaallu isumagissavaa nunalerinermut, savaateqarnermut imminut pilersornermut tunngasut sapinngisamik ataatsimoortinnissaat ukkataralugu.

Nassuiaatini ukunani *”Upernaviarsummi savaatilinggorniarfiup nunalerinermut ilinniartinnigortissinnaaneranut nutarterinissamut” & ”Inuili Ilinniakkanut pilersaarutit allannigortinnissaannut nutarternissaannullu periarfissat”* paasissutissanik katersinerit tunngavigalugit atuisut pisariaqartitaat Naalakkersuisut malikkusuppaat. Upernaviarsummi ilinniarnermi pissutsit, soorlu ilinniartuup illutai atugassarititaasullu naammaginangitsut tunngavigalugit ilinniakkap Narsamut nuunneqarnissaa atuisut immikkullu soqutigisaqartut kissaatigigaat paasissutissanik katersinerup takutippaa. Savaateqarnerup, nunalerinerup, imminut pilersornerup, inuussutissalerinerup, nutaaliornepup aamma piujuartitsinerup iluaniittut ilinniakkat nutaamik Narsami INUILI-mi katersorneqarnissaat tamakku tunngavigalugit anguniarneqassaaq. Taamaattumik pissutsit taakku tamaasa isiginiarnerisigut suleqatigiissitaliaq aqqiissutissanik ineriisaassaaq.

Ilinniartitaanermut, Kultureqarnermut, Timersornermut Ilageeqarnermullu Naalakkersuisoqarfik, INUILI, Aalisarnermut, Piniarnermut, Nunalerinermut Imminullu Pilersornermut Naalakkersuisoqarfik, Pinngortitamut Avatangiisinullu Naalakkersuisoqarfik, Savaatillit Peqatigiit Suleqatigiissut, Nunalerinermik Siunnersorteqarfik, Innovation South Greenland (ISG), igasutut ilinniarsimasut, hoteleqarnikkut neriniartarfeqarnikkullu inuussutissarsiortut suleqatigiissitaliaq peqataanissaat takorloorneqarpoq, taamatut aqqiinnikkut inuussutissarsiuteqatigiiaat aamma suliaqartut taakkulu inuussutissarsiutilerinerup iluani pisariaqartitaat kissaatigisaallu isumaginiarneqarput. 2026-mi jannuaarip qeqqani suleqatigiissitap pilersinneqarnissaa ataatsimeeqqaarnissaalu naatsorsuutigineqarpoq. Upernaviarsum tunineqarnissaa, savaatilinggorniarnerup Narsamut nuunneqarnissaa, aamma ilinniakkat atuuttut misissorneqarnissaat inuiaqatigiillu

pisariaqartitaat naapertorlugit nutarsarlugit ataatsimoortinneqarnissaat Naalakkersuisut aaqqiissutigiumavaat.

Nunalerinermut, imminut pilersornermut, inuussutissalerinermut, nutaalliornermut aamma piujuartitsinermut piginnaasat nunami tamarmi ataatsimoortinnerisigut inerisarnerisigullu ilinniagaq taamaattoq nukittorsaataassaaq. Silap pissusaata allanngorneratigut aamma imminut pilersornerup annertunerulerneratigut kiisalu annertunerusumik pisariaqartitsisoqalerneratigut unammilligassanut nutaanik aaqqiissuteqarnissamut ilapittuutaasinnaavoq, taamaasiornikkullu nunap iluani inuussutissanik tunisassiorneq aamma atasinnaanerusumik inuiaqatigiit ineriartornissaat tapersersorneqassalluni.

Taamatut tunngavilersuillutik siunnersuutip akuersissutigineqarnissaa Naalakkersuisut inassutigaat.